

東明縣新志

天津趙元禮



癸酉春月

東明新志

天津趙元禮



東明縣新誌卷之首

東明縣新志序

東明舊有志自清乾隆丙子重修後閱百數十年迄無繼作者宣統辛亥邑孝廉李曾裕起而修之名曰志續別於前志自爲一書其紀載亦僅及前志所遺暨以後之事而于前志已載者忽及焉設前志散佚則東明故實亡矣危固未有甚於此者余壬申夏來守是邦檢閱前志及李修志續以爲非例也宜重修之因集賢俊籌商聘長垣穆子箴君主其事子箴博雅士固籍東明而遷居長垣者東明故實亦多習聞語以余意子箴然之因取法塩山志舊制新事鎔冶一鑑分類紀載詳而不遺計分綱五分目二二名爲新志志成請余言爲序余因曰嗚呼著史亦難矣無博古通今之學不能匯萃精華無胙史枕經之才不能聯貫經絡遷史班書尙矣范曄之後漢書猶不免貽譏疏陋他可知矣志爲一邑之史具體雖微而訂例不能不嚴採事不可不慎陸清獻靈壽志世尠傳本窺探不易章實齋永清志余曾披讀體例之精嚴紀載之詳慎秉筆如斧鉞

立論如霆電宜其爲志乘之範也最近如賈佩卿鹽山志儼然一家言取法似史漢而落筆仍爲桐城蓋佩卿爲蓮池入室弟子學有淵源自非凡筆所可比擬故鹽山志實爲必傳之作亦卽可以繼範志乘者也子箴既力贊余說又主取法鹽山採刪之事間嘗請決於余而子箴固專筆政之勞者也佐其事者李子濯李宜亭胡宗周孟振亞皆斯邦一時俊彥之士余與李癡吾繆錫九穆子丹亦時參末議但斯役之意要不外重事實慎採刪萃新舊鎔精髓爲東明成一紀實傳信之志乘而已新志既成其前志並李君志續仍存之與新舊唐書殆相髣髴至本縣輿地之重要及人物古蹟諸事前賢舊序紀之甚詳余不再贅僅述新志之由來及余與諸君子審慎之苦衷卽以爲新志之序云爾東明縣長豐城瑾存任傳藻序

中華民國二十二年七月

東明縣新志序

邑之有志也猶國之有史也史宜詳明志亦如之民國肇造迄今二十有二年國體之變更改制之改革均爲前朝所無邑志之修更難容緩上年豐城任公瑾存來宰吾邦治政之餘諮詢黨政同人僉主重修以是設會從事聘長垣穆君子篋爲總纂公推李子濯胡宗周李宜亭孟振亞四君任分纂凡舊志已載新制未入者網羅鎔冶彙爲一鑑綱舉目張燦然如列歷時四月而新志告成愛東忝爲副會長例得述言弁首因陳緣起卽爲序言至如吾東邑志之沿革新志之由來與夫總分纂諸君學識才能已詳任公序中茲故不贅云爾東明縣縣黨部執行委員兼修誌委員會副委員長李愛東序

中華民國二十二年七月

東明縣新志序

余以樛材長教本邑每念一邑之文化與一邑之掌故最有關係良以徵文考獻苦無全書斯興學育才難集善政志書一端爲教育中事之尤當汲汲者也邑志自清乾隆以後迄無續修善本近雖有李君敦伯續志各稿然與前書各自爲卷且民國新稿尙藏之篋笥未付梓人客歲教局奉到組織文獻委員會之檄卽擬廣延學博實行從事適豐城任公瑾存縣長蒞東究心史學殫精文獻慨邑志之有待纂輯毅然以籌款集材爲己任癸酉三月乃組織修志委員會余以忝司教育得濫竽副長之責延請長垣名宿穆子箴君爲總纂以胡孟李李諸君爲編輯酌古準今合新舊爲一書體例簡括徵集宏富邑志得此自無抱殘守缺之憾余謂縣有志猶國有史一代之史必得其人而成之一邑之志亦必待其人而成之不遇其人寧缺焉耳如史記之創自馬遷厥後漢書則出之班固以及南史北史之有沈約李延壽諸公皆係一代之才成一代之書志之修又何獨不然是役也主其事者任公集其成者穆君余雖承事奔走一無佐助

愧其職之負而喜其書之成不可無一言以誌慚慙也遂書之以繼諸君之後東明教育局長兼修志委員會副委員長錫九繆五福題於修志委員會

民國二十二年七月

重修東明縣誌序

縣誌爲一邑文獻之徵凡山川城郭職官人物暨風俗錢穀之事紀載綦詳典至鉅也考東明地鄰豫魯控帶黃流古稱天雄之屬邑今作河北之邊疆舊有縣志續修於前清乾隆丙子至今百餘年間地理之沿革建置之興廢以迄忠孝節義之人物田賦徭役之增減闕然未備幾何不湮沒弗彰也豐城任公來長斯邑期年之間百廢俱興政績優良堪輓古循吏之選爰奉上命集貲創設修志局取舊誌而從新之延請碩學名流網羅採訪編纂刪訂公一以身董其事閱四月而全書告成古蹟軼事制度文章燦然大備覽斯誌者可以示勸戒廣見聞見政治之得失驗風俗之盛衰傳之永久而無敝豈獨以文字擅長哉任公以上考擢升大邑予承其乏接替之際殷以序文見屬辭不獲已聊以譚陋無文之筆紀其始末云爾 知東明縣事遼寧信綱序

時在共和二十二年夏月

東明縣新誌序

民國二十二年夏正月余奉東明縣長豐城 任公瑾存約修邑誌謝不敏弗獲既思先世漆人也義不容固辭乃抵東明得晤 任公及于役李宜亭李子濯孟振亞胡宗周諸君子籌商誌事連夕 任公出世所藏鹽山新誌見示且曰此桐城宗派賈佩卿先生作也出世未幾海內爭膾炙焉吾誌曷取法乎余與諸君子紬繹至再亦亟心折僉應諾遂分大綱爲五而名曰新誌茫茫神州唐虞間區爲十二禹平水土省三爲九濟河惟兗豫壤犬錯東明古漆園也實占二州之域黃流所經遷徙靡常或併或設易凡四五而當南北衝綰兩河穀人文蔚起名蹟斯多厥土赤埴黍稷油然惟地載物非物何國故首誌輿地建朔頒歷政布象魏春蒐夏苗國有常經隻乎三王尙已莫攀秦漢而降罷侯置守盧牟六合方制萬里考土責貢都鄙既章按方納物賦役有等官貳掌于職方黜陟屬之文選三司一條代有變更租庸鹽鐵時爲分合數千年史與志兩發之而兩盡之矣清社既屋民國方始凡百經緯有異前修雖天下爲公尼父言驗而

賢能輩起令甲實繁殷因于夏損益攸關周雖舊邦其命維新故次志經制國以衛民才以治國立賢無方自古已然兩漢選舉魏晉薦辟唐宋科舉明清繼之東明野分東壁代鍾瑚璉風會雲蒸勛銘鍾鼎鷹揚虎變烈著旃常賣劍買犢循良績選胝足劓鼻貞孝堪式莊叟逝矣感歌多士二賢藐焉文誅紛如鴻漸于陸羽用爲儀拔茅連茹以彙征吉故次志文獻爲疾用舒曾子垂訓民生在勤左氏所稱東明孤懸河表三盡是虞值茲鼎革之際遂爲剝復之機六府不修徒事會斂杼軸旣空荏苒滋熾生計維艱哀鴻徧野金融孔急賤夫罔利五教沓來四素莫講譬彼中流罔知所屆民亦勞止汔可小康故次志民生觀風問俗輶軒使過樽俎折衝儒者之責師旅雲屯敝賦悉索災荒頻仍大號間渙鏗然金石道里相望渺焉鬼神父老流傳周襄庚午齊會葵邱民初庚午晉師下齊玉帛干戈此地均屬樞紐四四甲子大事須紀前型可師殷鑒不遠徵人徵鬼酌兩用中故終志故實不特此也東明在宋以前所治卽今蘭陽儀封金以後始徙此乃唐宋冤句南華故地也異地同名異名同地考其時論其事兩無可依附者

須兩收之且志雖爲史餘不過史中通考一統志之一體耳晦而顯微而辨婉而成章之道雖與諸君子折肱折臂究愧未能故每脫稿之餘咸取裁于縣長 任公 公江右名士才擅歐黃者也往往一字一事之斧政全帙爲改觀焉先是東明故有志創修明嘉靖間近年續者爲李敦伯孝廉曾裕 先大夫夙好也今爲新志幸免續貂譏矣所恐靴訛誤亥豕混以負 任公及鄉士大夫託者更不免鹽山賈子之一笑也今已歲役將付剞劂氏爰以經過者而爲之序云長垣紫墀穆祥仲序

民國二十二年七月

東明縣新誌序

邑誌創修於明之嘉靖猶略繼成於清之康熙乾隆始詳其後直洎光緒之末中歷一百五十年楚黃周侯仲軒蒞東始督俛邑孝廉敦伯李君乃有賡修之事然書成兩卷儲爲家本並未付梓迄民國改元百度維新修志之令迭奉 省檄十三年甲子王公億年薛公鳳鳴長東明先後提議設局纂修仍以孝廉總其事冀以舊志新編分集爲書期達厥成事竣後得新志四卷仍未付印僅將前續兩卷發刊與舊志聯合爲書而新志終有殘缺之虞近以國史待纂文獻組會屢奉通令前歲辛未 省令復有徵集志料之舉時值縣長張公以誼在同學函邀以 鑒塞責草草成帙增慚譴劣無補採擇壬申豐城 任公瑾存宰東究心掌故乃惕然於邑志之缺略 任公史學夙抱文章巨手思將新舊溝通仿一統之例彙爲善本遂集議籌款求才立會特延蒲邑碩學穆君子箴總其事而以李胡孟諸君與 鑒供其分輯穆君又鴻博士雄文大家也惟參考近志體例如張蓉坡之滄縣志張子銘之獻縣志賈佩卿之鹽山志皆體例肅括蔚然

特出成爲一家通志局曾稱爲可奉圭臬者也三志門目相同惟滄誌多民生一目終取材滄志以提綱而挈領焉斯又後起之武功朝邑靈壽諸志之各自鼎峙哉江文通曰作史莫難於志誠以國有史復有誌而縣僅有誌省若府皆有誌而恆略於縣好古者欲稽一邑之故實舍此無徵縣誌不綦重哉况自清季變法民國革命凡百制度維新是圖此時搜羅編輯舊者宜相承而亦有變遷新者宜起例而尙非定制因與創均戛乎其難也賴穆君宏通淹雅字櫛句梳鎔鑄一歸至當越四月而事蒞從此邑誌有統一之書矣鑒亦從事斯役之一人喜其書之成遂述巔末於右分纂野園李振靈敘於東明修志會

民國二十二年癸酉七月

東明縣新志序

國史家譜郡縣志固相需相輔也然驟觀之三而一細繹之一而三而農王子言之詳且盡矣余今特爲廣曰提綱絜領按世編年是相似也若嚴褒貶若重統系若覈紀實是不同也數家譜系藉表列卿如歐陽公新唐書長孫無忌傳是一方輿地證明山川如姚郎中九江廬江兩郡存廢考是此乃相似不同外而固相需相輔也諳乎此則于三者之道思過半矣吾明故有志創自明嘉靖間迄清乾隆丙子續修者六迨後河決兵燹缺有間幾百六十年民國以來李敦伯孝廉曾裕曾兩續先正鉅製良不可誣所惜各自爲體耳壬申夏豐城 任公瑾存來宰是邦任公江右名下文章政事追慕廬陵者也文獻掌故下車後卽孜孜焉謀詢弗少懈亟擬重修邑志以收一條鞭之効余與黨部委員李君癡吾教育局長繆君錫九等亦深爲然于是公推長垣穆君子篴總其事余與李子濯胡宗周孟振亞得任分編參末議子篴余夙好其先世本漆人乃明鄉賢侍郎文熙裔淵源有自且素喜歐陽少師姚郎中者余知或可勝任愉快不覆我